

671.1207
084
1/1

志實事

軼聞
志餘
大事年表

滄縣志

趙元禮題



戊

卷之十四
卷之十五
卷之十六

滄縣志卷之十四

事實志五

軼聞

古今載籍雖博不能統事物之鉅細据撫而無遺經傳子史而外可以擴人聞見而廣人知識者莫如軼聞茲綜彙滄郡之故實爲正史所不及載者旁搜博採筆之於書俾昔日之異跡奇蹤不至以代遠年湮盡歸於淪滅後之覽斯編者如聽通德之說漢宮故老之談天寶動人無限低回無限感慨事雖近乎稗官野史而訂墜拾殘亦或可補文獻之不足而增邑乘之餘韻也志軼聞

北夢瑣言張虔釗性貪鄙鎮滄州日因亢旱民飢乃發廩賑之

事聞上甚嘉賞他日秋成倍斗徵歛常言自覺言行相違然每見財不能自止時人笑之

玉堂閒話梁戴思遠任浮陽日有部曲毛璋性輕悍常與數十卒追捕盜賊宿於逆旅枕劍而寢夜分劍忽吼躍出鞘外毛叱曰某若異日有此山河爾當鳴躍否則已毛復寢未熟劍吼躍如初毛深自負其後戴離鎮毛請留戴從之未幾毛以州歸命於唐莊宗以毛爲刺史後竟帥滄海

明自太祖不設宰相以六卿分職用人行政尙書主之侍郎佐之至中葉始渝其制英宗復位以後洞悉人情慎簡部臣委任勿貳其時冢宰則王忠肅翔司馬則馬恭襄昂實司用人之柄

凡文武百官之予奪進退必召二公面相咨度至再四商確而後行恭襄固滄人忠肅籍鹽山亦滄屬也宦業可謂極盛

池北偶談呂鴻少祖望康熙乙巳病亟夢天帝召爲東嶽神力辭不獲因訂後期遂引疾歸舟過張家灣忽沐浴更衣冠端坐曰時日近吾將去矣舟中人隱隱聞空中鼓吹聲見騶從云

幙城內之東南隅舊有東嶽廟地幽僻人跡稀少每值陰雨晦冥旌旗隱耀夜半嘗聞呼號聲人無敢入者明神宗朝通政李觀光未遇時與友輩讀書其中語及廟神靈異李公云余敢夜取其笏友不信因以酒筵爲賭中有二友膽亦壯遂先至殿中伏供案下伺之忽聞神語曰通政李子來借笏慎勿驚之二友

聞語驚悸昏迷俄李取笏去詰朝詣友家索飲而二友未歸初疑其誑也及僧入殿焚修見二友臥案下氣息不絕如縷覓人舁回其家逾日方醒與人備述其事無不駭異後李果成萬歷丁丑進士官至通政今廟中尙有靈跡在笏四字匾額即指此事

歲當乙卯余偕友人王鶴如淬志西墅坐臥小室中暇即扶箕迓仙書紙爲戲蓋予先得此術於清源之金生凡有禱求即立降作書始雖多弗解語後悉應如左券即予壬子得售預報名數無不巧合余益敬信之一日有仙降筆自書爲王懷赤叩其儀容冠服則曰白面微鬚頂九華巾著玉蘭大袖絲縑草履默

度其人有飄飄出塵之概其爲語或詩或詞或長短歌雜以笑謔嗣是屢請屢降杯醪款洽殷殷爲異世交余隅談及所聞懸筆仙鸞事因叩其可否即云丈欲卜終身正非懸筆不可然惟請關聖誠則立降稍有不誠獲戾不淺無輕舉也再四虔懇遂定期於三月二十日與鶴如偕田融眞齋沐祈請於西園之舍虛樓禱畢自寅至巳方敢登樓眎紙封如故拆觀之則飛白滿楮有三子功名弼可立俟之語余三人各神竦不自持神使之也山陰王元臺余與交莫逆是日因南旋未與及聞神降即飛轡來觀無不驚駭其異明春丙辰余果復得售因援筆記其始末時萬歷丙辰孟冬二十七日渤海香雪居士王公弼識

王少司農直卿生未晷而孤既長每以不得見先人爲恨王素精扶乩術壯繆常降壇撫山東日因虔請於壯繆曰弼生不辰幼不識父神其憫之俾弼得見先父面可乎曰子父死已久必欲見之將追魂攝魄於死者不安甚矣王流涕固請曰子孝思可嘉吾當有以慰之然幽明不能謀面爲子請吳道子寫汝父眞容可也王喜極因懸筆室中鐫其戶以伺之夜半聞室中筆墨聲未幾有狸奴撲鼠即聞室中若驚而失筆於案者久之闐然啟鑰視之則像已就但未及肩以下且頰有墨痕因懸其像於堂適有老僕自外入見之大驚曰此非老主像耶即泣拜於地至誠感神於此益信

滄酒得名久矣相傳呂祖來飲於此後人因建樓以岳陽名之
即取三醉岳陽人不識朗吟飛過洞庭湖之遺意也樓聯有云
黃鶴偶乘滄海月白雲遙帶楚江秋

州城東南隅相傳有大蛇穴其下屢爲物害天齊廟西有三義
廟其殿前楹之右懸鐵胎弓一鐵弦殼之鐵矢三向共指爲神
物里中有爲童子師者設館於廟從遊凡數人一夕忽失其一
質明其父母相與哭訴於神中夜居人咸聞殿中弦響如霹靂
聲曉視之則失一矢衆莫識所以少頃見有大蛇爲矢所貫斃
於城上其尾在城外者猶數丈始知童子爲蛇所吸也其患始
息

劉慶藻字佑伸順治乙未進士任江南虹縣令康熙間三方蠹動又值連歲饑饉一切芻糧夫役民無以應公憫念窮黎因作十三腔粘於堂壁挂印而去督撫錄其詞奏聞遂免賦役十分之七民命以蘇詞曰「十三腔」一事無成已白頭馬牛碌碌幾時休生來未具封侯骨誰叫分符到夏邱「北新水令」荒

烟斷草暗塵沙舊陰陵英雄叱咤憑高悲楚漢舉目嘆桑麻謾自嗟呀呀呀古夏邱今變作阿羅刹「南步步嬌」訟庭荒蕪

迷臺榭遺垢堆階下枯槐泣餓鴉點金無術誰納禾苗稼比戶

懸磬家只落得似斗孤城大「雁兒落」俺也會做耆卿填詞

烟花俺也會學寄奴擣菰揮灑到而今反做個有司出納說甚

麼仙吏風流真可誇
「南沉醉東風」最堪憐鵲面的百姓怎
禁這虎猛烈刑罰問着他鳴喇拶着他咦呀戰篤悚盡是些葫
蘆話本待要豁免他怕上臺叅罰欲待要苦比他還怕萬民唾
罵
「得勝令」幾回待拂袖東陵學種瓜神武門前把朝冠掛
又怕他白簡飛霜將姓氏查因此上進退維谷暗自嗟簽押對
隻影把筆拿排衙兩皂隸一齊下
「忒忒令」猛可的上官怒

發火牌書吏提叅嘆節年遞逋叫俺何處緝查那府差凶似虎
狠似狼一箇箇舞爪張牙
「江兒水」緊簽兒交加鎖頭兒數
他嚇得那書吏經承好一似哀猿悲鴉鬧嚷嚷公堂下一地胡
亂拿著鐵索牢挂一霎時似甕中捉鼈井底擒蛙
「北川撥

棹」更苦的是往來兵馬附郭外鎮日騰樵可憐豆似珍珠米
若丹砂鹽菜銀俱要冰窪憑誰募化只落得擊髓敲骨還是鄭
當產析家「園林好」呀望君門遠似天涯這疾苦誰陳闕下
俠流圖空自把好料我一腔熱血不由得冰消雪花「尾聲

這棚戲兒收起罷海闊天空任瀟灑博得箇三千白髮一輕
車

吳沂官潼關道擢甘肅按察使時年七十有三未抵任以疾終
歿之歲先有二鶴飛集庭中向沂作旋舞狀沂甚異之作詩咏
其事賦就長吟數過乃歎曰鶴名仙禽向予而舞其以予官三
十年清操潔白與之相感召乎抑或知予壽盡將駕之以集華

表乎不然天空寥廓伏不高翔雲際而遽集於此耶欬吁再四未逾月而溘逝詩載滄州詩鈔

居易錄滄州張漢儒病彌留夢三番僧以手三摩其腹立愈遂發願謁四名山至普陀謁大士畢欲歸見一老人於洞外掃除語之曰若欲見大士乎張曰然老人曰但誠心虔禱當有所睹張乃與同輩十餘人跪禱久之忽見洞口有金光老人曰大士出矣衆諦視果見大士露出側面又禱曰旣蒙大士現身願睹正面旋即背洞面海去人咫尺紺髮卷鬚高顴隆準衣綠色半身在雲氣中衆方歡喜稽首倏忽不見

舊志王詩王訓兄弟也皆能記其前生事訓自言前生本山左

書生學使案臨數試不能博一衿歸而憤惋成疾自念我生窮困不若棄家遠遊因恍惚就道歷數處皆不當意遙見綠楊深處微露畫樓一角因欣然往登樓視之闕無一人而碗茗爐香了無俗韻俯視樓外則奇花蓓蕾幽竹蕭疏池水澄清游魚可數私念若得在此讀書即是洞天福地曷不歸取書笈來此下帷遂循舊途歸至中途覺倦即樹陰少憩忽又來一人互相問訊則江南孝廉因落第亦欲下帷攻苦者也訓邀之同返故處周視之孝廉亦首肯因相約以某日至此遂別去歸家豁然如夢見家人相向哭衆謂其復生訓曰吾特歸取書冊耳衆以爲病中囁語訓不顧取載籍捆束之既畢恍惚出門至前樹下孝

廉以至相偕行途迷誤入閨閣中見一婦人呻吟牀蓐間衆婦環伺之牀前蹲一獅貓圓睛眈眈若虎畏甚姑避牀下貓忽逸去驚駭而啼自顧則嬰兒矣蓋孿生也聲音笑貌相肖如同伯偕及長母以服別之後同爲諸生

睽車志滄州有婦人不食惟日飲水數盞年近五十而容貌光澤人問其故因言自幼母病在牀家貧又無兄弟惟日賣果於市得贏錢以供母後值歲歉米貴因仰天虔禱曰此後所獲不足以贍二人飽願天憫我使我飲水不飢盡以所獲供母自此以後果飲水不飢而貌益豐腴

劉太史果實襟懷夷曠有晉人風與飴山老人蓮洋山人皆友

善而意趣各殊晚歲家居以授徒自給然必孤貧之士乃容執
贄修脯皆無幾簞瓢屢空晏如也嘗買米斗餘貯罌中食月餘
不盡怪之忽聞簷際語曰僕是天狐慕公雅操日日私益之耳
勿訝也劉詰曰君意誠善若不能耕此粟何來吾不能飲盜泉
也後勿復爾狐歎息而去

瞽者蔡某每過南川樓下即有一叟邀之彈唱且對飲漸相狎
亦時到蔡家共酌自云姓蒲江西人因販磁到此久而覺其爲
狐然契分甚深狐不諱蔡亦不畏也會有以閨壺蜚語涉訟者
衆議不一偶與狐言及曰君旣通靈必知其審狐艷然曰我輩
修道人豈干預人家瑣事夫房幃秘地男女幽期曖昧難明嫌

疑易起一犬吠影每至百犬吠聲即使果眞何關外人事乃快一時之口爲人子孫數世之羞斯亦傷天地之和召鬼神之忌矣況蛇杯弓影恍惚無憑而點綴鋪張宛如目覩使人忍之不可辨之不能往往致抑鬱難言含冤畢命其怨毒之氣尤歷劫難消苟有幽靈豈無業報恐刀山劍樹之上不能不爲斯人設一座也汝素樸誠聞此事當自掩耳乃考求真僞意欲何爲豈以失明不足尙欲犁舌乎投盃徑去從此遂絕

劉上玉孝廉有書室爲狐所據白晝與人對語擲瓦石擊人但不睹其形耳知州平原董思任良吏也聞其事自往驅之方盛陳人妖異路之理忽檐際朗言曰公爲官頗愛民亦不取錢故

我不敢擊公然公愛民乃好名不取錢乃畏患耳故我亦不避
公公休矣毋多言取困董狼狽而歸咄咄不怡者數日劉一僕
婦甚粗蠢獨不畏狐狐亦不擊之或於對語時舉以問狐狐曰
彼雖下役乃眞孝婦也鬼神見之猶斂避況我曹乎劉乃命僕
婦居此室狐遂去

張鉉耳夢中作一絕句曰江上秋潮拍岸生孤舟夜泊近三更
朱樓十二垂楊徧何處吹簫伴月明自跋云夢如非想如何成
詩夢是想平生未到江南何以落想至此莫明其故姑錄存之
桐城姚別峯初不相識新自江南來晤於李銳巔家所刻近作
乃有此詩問其年月乃在余夢後歲餘開篋出舊稿示之共相